

769.

LE IEV
DE L'ESBAHY
DES CENSEVRS
ESTONNEZ.

M. CD. XX.

THE NEWBERRY
LIBRARY

Case

F

39

1326

1620f

LE IEV DE L'ESBAHY DES CENSEVRS

estonnez.

I Amais les temeraires Geants, Pyracme, Ty-
phée, Encelade & autres coniurez contre le
haut tonnant Iuppiter n'eurent si grand peur,
ne receurent vn tel esclat sur leurs superbes tes-
tes, n'eurent telles affres ny iournee si chaude,
que lors qu'ils sentirent le trifulque brandon
de cet irrité Iuppin : pourquoy cela? qui auoit
mis en celle fougue & si aspre colere ce grand
fils de Saturne? Le voulez vous sçauoir? sça-
uoir? ie vous le vay dire, & le cognoistrez à
l'œil, & par l'experience qui s'en pourra voir
quelque iour & plus à loisir, sur ceux qui à
la façon des Flamans & Hollandois veulent
courir avec hautes enchasses & fouliers mal
ferrez sur les riuieres glacees de leur pays allās
au marché vendre leur lait & beurre, ou sou-
uent ils le versent & se rompent le col. Ces su-
perbes Critiques Censeurs, & Geants force-
nez, voyans ce Iuppin commander seul & sans
compagnon absolument en son throsne (hé
gueux, canailles, Censeurs, Geants effrontez,
voulez vous bien ietter vostre foible veü sur
les affaires des grands?) que firent ces galands?
ils comploterent ensemble de contrecarrer ses
volōtez: s'opposer à l'autorité de son sceptre:

Voire, ô chose digne de risée: mais de chastiment rigoureux & exemplaire; luy voulurent faire la guerre: ils mettent rachers sur rochers, montagnes sur montagnes, & pensans depuis là donner l'escalade au Ciel, l'aller prendre prisonnier, & se mettre en son siège, ils se virent en vn instant bouleuersez & grillez par cest impitoyable foudre: ô temeraire audace, mais tres-iuste supplice, nihil audendum supra vires, il ne faut rien entreprendre par dessus ses forces. Quicquid agas prudenter agas, sed respice finem: tout ce que tu feras fay le prudemment, & regarde à la fin: le bon compagnon disoit respice funem, regarde à la corde, & au chastimēt faite de bien faire. Ceste temeraire ambition eschaufa de mesme fole ardeur le ieune cœur del'infortuné Phaëton fils du Soleil, qui desfireux non seulement d'entrer au conseil des Dieux (prenez garde à cecy grâds recherchercheurs d'honneurs & de terres) voulut comme par force violenter son pere à luy laisser pour vn iour l'honneur de la conduite du beau chariot du Soleil: mais mal luy en prit, & à tous ceux qui aspirent trop haut: car ne sçachant ce qu'il demandoit, encor moins l'execution perilleuse de sa fole demande fut culbuté du Ciel en bas, laissant vne triste & perpetuelle memoire de son outrecuidance. Mesme folie agita & troubla le cerueau du miserable Icare, qui voyant son pere avec aisles artificielles de plumes encirees parcourir la region des oiseaux, en voulut faire autant & pria son pere de luy en

agencer de semblables aîsles: mais n'ayant sçeu tenir le chemin & l'adresse qu'il luy auoit monstree: *medium tenuere beati*, dit le Prouerbe, la mediocrite est tres-belle & asseuree, voulant voler trop haut avec ses foibles & mal asseurees aîsles de cire: le Soleil se mocquant de son audace les luy fondant peu à peu le fit tresbucher dans les impitoyables & perilleuses vagues de la mer Icarienne, ainsi depuis nommee du nom de ce temeraire Icare. Le iour defaudoit plus tost que les exemples de tel sujet, hó qu'il y a auioird'huy beaucoup de ces temeraires Pyracmes, Typhées, Phaëtons, Icares qui osent temetairement mais trop impudemment sourciller comme Zoiles & Tersites les tres-sages actions de nostre bon Roy, vrayement surnommé Iuste, pour ses tres-vertueux & loüables actes enuers tous, n'y ayant que ces impudents censeurs qui tous estonnez ioüians à lesbahy, veulent neantmoins apporter leur *quomodo?* comment qu'est cecy à dire? il n'y a que deux ou trois hommes en Frâce auioird'huy, qu'on ne sçait non plus leur origine que celle du Nil, ny quels ils sont: on pourra auoir des nouvelles de leur braue extraction dans les papiers iournaux du Comte de Lude, & combien ils gaignoient le mois chez luy pour leur seruice: hó que c'est auoir vn bon esprit de profiter si bien en peu de temps: il n'y a pas long temps qu'ils fournissoient la voliere du Louure, d'oiseaux: ils ont bien fait profiter le pipet: ils ont pipé les plus braues hommes, les meilleures

places, les meilleures terres, les meilleurs citats
 les plus belles & fauorables alliances, & les
 plus belles pistolles & escus, est-ce pas bien
 faire profiter le talent ? voila vostre langage
 Censeurs. Hé marauds qui causez tant, vous
 n'avez pas l'esprit d'en faire autant : il faut de
 l'esprit vous dis-ie pour faire la pouldre &
 l'Elyxir qui fait toutes sortes de merueilles : al-
 lez, allez vous n'en parlez que par enuie, & di-
 tes moy, si vn homme ne se sçait aduancer que
 sera-ce de luy ? voyez vous pas qu'on ne tient
 conte de ceux qui n'ont des pistolles : mais vous
 me direz qu'il ne se faut point tant aduancer en
 vn coup, qu'il ne se faut point enrichir si tost
 pour ne tenir conte de personne : que les riches-
 ses sont passageres, qu'elles sont les esbats de
 fortune, les miroirs d'auarice, & l'infidelle en-
 tretien de ceux qui les possèdent : mais le sage
 Platon dit bien autrement : car il tient pour as-
 seuré, qu'on ne peut paruenir aux grands hon-
 neurs sans moyens & richesses : le voyons nous
 pas pratiquer aujourd'huy par ceux qui se veu-
 lent estimer comme saincts hommes ? & pour-
 quoy courent-ils tout le iour de maison en
 maison pour en auoir ? & s'il n'estoit du tout
 necessaire, pensez vous qu'ils prissent tant de
 peine comme ils font ? & que nenny biffiez
 moy cet article il n'est point receuable : vous
 estes de mauuais gens de carculer ainsi.

Malins Censeurs, pourquoy portez vous
 tant d'enuie aux hommes de bon esprit ? parce
 que n'y pouuez paruenir, vous n'avez pas le

passé-par tout, vous faites comme le Renard, ne pouuant monter sur le meurier, accusoit les meures d'estre mauuaises pour son estomach: ainsi dites vous, ceux-cy ont le plus beau de la France, terres, finances, credit: & bien, quoy pour celà? sçauéz vous pas bien qu'il n'est donné a tous d'aller à Corinthe? presque tous ceux qui vont à saint Iacques portent le bourdon, & n'ont autre recompense au retour de leur penible voyage: Há que le court chemin est le meilleur, j'aimeroye mieux vingr aulnes de double ducats que cinquante aulnes de grosse toile: voyez si i'ay tort? faute de bon esprit fait souvent refuser les personnes.

Hó qu'il y a de drogues qui font saigner du nez les Medecins & les Philosophes pour la pluspart qui n'ont estudié que dans Gallien ou Hippocrate, & quelque peu en Agrippa en son liure de Arte rapiendi.

Auttes diront, est ce la raison que les estrangers soyent assis à table, qu'ils boient & mangent le plus beau & le meilleur de la maison, & que les enfans legitimes seruent de Laquais pour porter les plats & mets sur la table deuant ceux-cy, & qu'ils dînent à la derniere table avec les valets? voila vne chose bien estrange! c'est maintenant que ie iouë bien à l'esbahy, voyant ce que ie voy.

Mais dequoy te mesles-tu, Censeur estonné? iouë à ton ieu de l'esbahy: mesle toy de ta cuisine & de mettre du safran aux choux: & ne te mesle point des affaires des grands: car tu auras

taloche sur les doigts bien ferré.

Cen'est pas tout, il n'y aura pas iusqu'aux sa-
les sauetiers qui n'en veulent causer & dire
leur ratelee.

Helas ! mes amis , qu'on dit bien vray , ce
quele maistre donne & le valet pleure ne sont
que larmes perduës ; ce ne sont que vains souf-
pirs en l'air & au vent.

Ces blesmis Censeurs d'enuie , vrayes pestes
du Royaume (parce qu'ils entreprennent sur
les actions du Roy , qui ne fait rien qu'avec iu-
ste balance) dans vn regne paisible, ou la vene-
rable iustice tient le fort timon : bref ou tout
va par ordre, ne pouuans satisfaire à leurs des-
seins, n'occupent leurs esprits, & ne bandent
les nerfs de leur temerité qu'à enflammer le
cœur du peuple à mescontentement & sedi-
tions feront à croire au peuple que cestuy-cy
ou cestuy-là sont cause des impoits & charges
qu'on luy met sus, pour enrichir trois hommes,
les faire grands, les marier richement & leur
ferrer le ventre de pistoles, ie croy bien qu'on
le dit, & que c'est le commun discours de tous,
& bien autre chose qu'on n'ose pas dire: quel
remede?

Ha, Censeurs enuieux, quand vous auez
vn bon Roy Henry de Valois debonnaire &
religieux, vous l'auiez osé menacer de le con-
finer en vn monastere, & au lieu de la deuise
manet vltima coelo, vous auez publié par tout
& dit, manet vltima claustro, la derniere cou-
ronne sera dans yn conuent ou cloistre : quand
vous

vous auiez vn Henry le grand, duquel la dextre estoit redoubtee aussi bien loin que pres par ses genereux exploits d'armes, & qui vous faisoit trembler de son seul regard plain d'admirable Majesté, vous ne vous osiez opposer à luy, car il rengeoit tout au pied du deuoir: mais secrettement par ruse damnable auez bien sçeu trouuer le moyen de ne l'auoir plus & le voir tuer dans sa ville de Paris. Ha! bestes noires infernales.

O Seigneur Dieu, ou sont vos foudres pour exterminer ces ames desloyales, qui ont noyé la pauvre France de pleurs pour la perte d'un tel Roy incomparable! Auez vous maintenant vn Roy ieune d'ans? mais desia aagé en sagesse, vous calculez, vous glosez, vous syndiquez, vous controlez la force de son bras, la puissance, ce absoluë de son sceptre, ses volonteés & ses actions? mais ie vous demande s'il estoit permis à chacun sa caprice d'oser reformer & borner les actions de Roy, on ne verroit que mescontentemens, que guerres, & monopoles: s'il estoit permis à chacun d'Aristarquer les volonteés & plaisirs du Roy, que seroit-ce? luy qui peut commander absolument sera-il subiet à Censure? & vous direz encor, il donne tout à ces trois, il donneroit volontiers à l'un sa couronne, à l'autre son sceptre, & à l'autre son espee, & à quoy tend tout cela? rien qu'à esmouuoir le peuple qui leur en veut desia tresbien, qu'à aigrir les courages, qui ne sont que trop animez: qu'à broüiller les cartes qui le

sont assez à la ruyne de plusieurs, qui s'en viennent sauuer dans Paris : bref de faire monter sur le funeste theatre la sedition armee: elle n'en est pas loin si le mal continuë.

Mais ie vous prie taisez vous, arrestez vous: nostre sage Roy & bon Prince, ainsi que nous esperons, comme vn second Salomon connoistras tres bien avec le temps, venit vsus ab armis, l'experience vient avec les ans ceux qui l'auront mal accompagné, d'avec ceux qui l'auront fidellement suiuy & conseillé.

Quant à ceux qui n'auront recherché que de Paroitre grands, & estre nommez fils aînez de fortune, qu'à piper le Roy par subtil moyë, qu'à s'enrichir par la vuidange des coffres du Roy & du public, & qui ne s'estans recognus eux-mesmes, ie les voy comme Phaetons & Icares sur la haute vague de leur naufrage.

Ie voy fortune qu'ils ont tant adoré & recherché reffrongnee contre eux, qui leur montre vn triste & affreux visage, qui desboucle sa rouë & sa boule pour leur donner le fault, & les enuoyer plaider leur cause au regne de Proserpine, ou ses Tantaes, Lycaous & Tiranneaux sangsuës seront finalement accommodez comme il faut par Æaque, Minos & Rhadamante.

Ceux cy se seront abusez comme ie croy: ils ont ouy dire, ou leu, que les anciens donnerent autrefois à fortune la corne d'abondance avec le timon d'un nauire, parce qu'ils la recognoissoient Roynne de la terre & de la mer: mais cō-

me elle estoit alors variable, ainsi auioird'huy à leur dommage ils l'experimenteront inconstante, legere & muable, & seulement constante en sa mobilité & changement : toutefois, on dit, qu'il n'est que d'en auoir, & que ceux qui sont aupres des grands ont le plus gras potage, & le vin plus frais, que les autres qui se tuent à ne rien faire.

Mais ie ne sçay si nous suiurons le conseil de Seneque, qui en vne Tragedie n'est pas d'aduis de suivre fortune, car il luy en veut, ie ne sçay qu'elle luy auoit fait, il dit,

Demeure debout & puissant,
Qui peut sur le feste glissant,
De la bienueillance d'un Prince.

Mais moy ie ne souhaite rien,
Qu'auoir en paix vn peu de bien,
A l'esclat en quelque Prouince.

O la grand folie à vn homme de se ietter sous la conduite du vent de fortune pour faire vn heureux nauigage : pout s'estre trop fié à ses forces: mais aussi trop debiles.

Le pauvre Leandre mal conseillé, & n'estant conduit que par la voluptueuse persuasion del'aucugle Cupidon fut cause de deux malheurs : il se noya, (ayant trop souuent essayé la mer Abyde,) escoutez cecy entrepreneurs) au bord & au pied de la Tour de Seste, voulant entreprendre chose defenduë, à sçauoir. de coucher avec la vierge Hero, consacree & dediee à Venus, les commencemens furent

plaisants, mais la fin malheureuse : mal conseil-
lez tous deux, ils perirent de mesme façon dans
les impitoyables vagues de la mer helle ponti-
que: La Lune ne leur fut favorable traictant de
leurs amours secrets sous son silence, prenez
garde, ceux qui sont monopoles sans bon con-
seil à la fourdine sont attrappez, ils sont naufrage,
parce qu'ils n'entreprennent, sagement ce
qu'ils font.

**Trop tard on se repent quand la fau-
te est commise.**

On n'entend autre chose tous les iours, si-
non que hélas ie me repens d'auoir fait telle
chose, ha, si i'y eusse pensé mon cas iroit bien:
si ie ne me fusse marié si tost, i'eusse au le loisir
de porter les cornes, i'auois assez de temps, pa-
tience, nostre contrairie en est tres-bien peu-
plee, auant que tous ayent rendus leur pain be-
nit, ma femme m'aura bien gagné de l'argent
pout faire le mien.

Mais i'apperçoy, (encor que ie ne foye
Astrologue) vn grand esches aux remueurs
d'affaires, ils seront chastrez & chastiez: car
mon Almanach porte que,

Aucuns remplis de male humeur,
Verront l'effect des sept Planettes,
Notamment de Iuppin l'ardeur,
Dardant son foudre sur leurs testes.

Et bien qu'en dites-vous messieurs? cognoi-
sez vous bien ce Iuppin? Turnus ce grand Ca-
pitaine de l'armee Phrygienne ne paroïssoit

point si haut, il s'en falloit beaucoup, parmy ses
 Soldats & Capitaines, comme fait nostre grand
 maistre qui est en chemin de se faire voir, & es-
 teindre à sa seule veuë ces enfumez flambeaux,
 qui par leur odeur empuantissent tout le passa-
 ge. & pourtant voicy ce que le bon messager
 des Dieux antiques Mercure, c'est luy mesme,
 qui trencha la teste de ce folastre Argus, qui
 pensoit tout voir, mesme vouloit garder Iô
 malgré luy (entendes cecy) voicy son cartel
 de deffy.

Quelques vns par top hasardeux,
 Pour vouloir vuider trop d'ordure,
 Se verront frotter de mercure:
 Mais ie n'entends pas du fumeux.

Ce minoral de Mercure est souuerainemēt
 propre pour dissiper les mauuaises humeurs de
 ces corps Hypochondriaques, melancoliques,
 fumeux, fougneux, peteux, vesseux, & qui ren-
 uoyent tous leurs plus serieux conseils au con-
 clauē de la confrairie de maugouuert.

Mais la plus-part de ces ambitieux ne sacri-
 fient qu'à fortune, qui fait ordinairement com-
 me les sorciers, elle ne peut endomager que
 ceux qui la craignent ou qui l'adorent, & plus
 son amitié semble estre grande enuers quel-
 qu'un, guarda, disoit l'Italien, plus elle luy fait
 tenir ses enchantemens & charmes sous les-
 quels ils se trouuent enuelopez & perdus. Ils
 se trouuent aussi lourdement trompez comme
 furent autrefois les Atheniens, qui portoient

en leurs guidons de guerre l'image de fortune encadenassée de chaînes d'or, voulans comme par force la retenir dās leur ville: mais ces chaînes d'or furent en peu de temps rompues par le fer mesme de fortune: (entende qui pourra) qui a mis la miserable Athenes en pareil degré que la superbe Troye.

Fortune est plus aisée à trouuer qu'à la pouoir retenir: elle esleue par vn peu, mais sans qu'on y pense elle abbaisse rudement & fait le mesme tour à ses mignons & fauoris, comme le chat à la pauvre souris, v'sant seulement alors de quelque iustice, qui est semblable à la mort qui ne pardonne ny à petits ny à grands: ceux qu'elle a esleuez de bas lieux & incogneus, elle les terrasse en vn instant, i'en ay tant veu d'exemples n'y a pas long temps, que c'est folie d'en parler.

Fortuna vitrea est: quum splendet frangitur: allez vous y fier: cherchez par tous moyens d'estre gouuerneurs des Prouinces, d'estre Seigneurs, Ducs, Comtes, Barons, Marquis, voire de prendre la Lune à la main, tout ce que vous voudrez, garde le heurt: si n'avez accoustumé de longue main tels honneurs, adieu le ieu, adieu la voicture: vn petit tertre est de longue duree, & comme disoit nostre Pybrac.

Qui des faueurs des grands veut abuser,

Bien tost froissé chet au bas de la rouë.

Ixion chez les Poëtes nous en fournit vn notable exemple: pour s'estre trop temerairement osé approcher de la deesse Iunon, mespriant desia les inferieures Deitez, fut condamné aux enfers d'estre attaché à vne rouë par des Serpens au lieu de cordes, qui le pinçoient & mordoient incessamment. Il y a icy à gagner qui le sçaura.

Ceux qui ne sçauront comme il faut, cultiver l'amitié du Roy avec discretion, prudence & sagesse, se tromperont de plus de la moitié de iuste pris, & trouueront grand erreur en leurs comptes.

Ceux aussi qui pillent sourdement & en tapinois les deniers du Roy, en le flatant & abusant, sans doute leur aduiendra tout de mesmes qu'à Cepio Seruilius Consul Romain qui mourut miserablement pour auoir pillé l'or au temple de Tolose, & tous ceux qui en toucherent avec luy. La Conchinerie en vid & sentit n'y a pas long temps les effects, & qu'on ne pense point se iouïr au Roy: car s'il descouure vne fois le pipet des pipeurs eux mesmes se trouueront pipez par leur pipet: Ceux aussi qui se mocquent de la France, disans, qu'elle ressemble vn Oyson, auquel il reuiet tousiours autant de plume qu'on luy en arrache, qu'ils prennent garde à eux: car les François se prennent, & ne lascheront la plume, sans que l'entrepreneur n'y perde la sienne: bon homme garde ta vache, bon chien tien l'os.

De cest an l'Almanach nouveau,
Promet par vn certain presage,
Non du froid, ny gresle, ny eau,
Mais aux fols vn tres-grád dōmage.

Adieu donc à reueder.

F I N.